



EDITORIAL

Gobierno riba abuso sexual cu mesun promesanan cu no a wordo cumpli

PA: Victor (Toko) Winklaar



AYERA mainta Gobierno a yama un conferencia di prensa pa atende cu ultimo casonan di abuso sexual contra criaturanan inocente cu ultimo dlanan, a bolbe bira un situacion cu ta hopi preocupante.

Casonan cu ta laga hopi pregunta atras y cu ta bolbe lanta duda den henter e sistema di proteccion social cu mester tin den nos comunidad y cual situacion ta bolbe lanta duda den e plan social cu Gabinete Wever Croes tin mas c'un aña ta implementando, pero sin resultado bisto.

Ta mas cu claro cu comunidad ta busca contesta di esnan na mando, ta busca pa mira kico Gobierno ta bay haci pa evita of minimalisa e tipo di abusonan aki, sigur di un Gobierno cu a sigura pueblo cu e tin solucion p'e problema social di nos pais, tin solucion rapido pa implemente un castigo minimo pa spanta abusadornan, y a sigura pueblo cu lo caba cu criminalidad pa gran parti.

Despues di un aña y mei na mando, Gobierno di coalicion ainda no ta cumpliendo cu promesanan haci, e.o. pa percura pa un sistema mas efectivo y confiabel pa proteha nos muchanan contra abusadornan, pero manera a wordo comproba atrobe, Gobierno ta ley di cumpli cu e promesa aki.

No solamente esey, pero e mesun mandatarionan tin un forma di contradeci otro y cual situacion ta lanta duda den pueblo si tin seriedad den e Gobierno aki ya cu Prome Minister Evelyn Wever Croes, na varios ocasion na inicio di su Gobierno, a declara enfaticamente cu su Gobierno lo tuma 6 minuut pa cambia e ley cu ta regula castigo minimo pa abusadornan di mucha, pero cual 6 minuut a pasa dia bieu.

Tur cos ta mostra cu oloshi cu mester a marca e 6 minuutnan aki pa Gobierno, su bateria a caba na di 5 minuut y nunca mas a yega e 6 minuutnan di cambio cu Prome Minister a priminti di lo haci asina cu su Gobierno a sinta.

Ta bin acerca cu e siman aki Minister di Husticia, Andin Bikker ta papia di un concepto di ley prepara pa fraccion di su partido POR, caminda ta regla e asunto di castigo minimo y cu esaki pronto lo ta na Parlamento pa wordo trata.

Sinembargo si corda bon Minister Bikker ta papia di un concepto di ley cu expertonan a desbarata for di otro, mustrand cu tin hopi aspecto cu no ta posibel y cu esaki tin cu wordo cambia of adapta.

Pues di un banda Prome Minister a papia di un proceso di cambio di ley cu lo dura 6 minuut y ta bin su Minister di Husticia cu ta papia di un concepto nobo di ley pa cu castigo minimo y caminda lo laga espacio pa Huez dicidi si un acusado di e delito aki, merece un castigo mas abou of no.

Si esaki t'e caso e situacion ta keda mesun cos, ya cu ta keda na opinion di e Huez pa determina si un acusado di abuso di menor di edad, merece un castigo mas abou cu e ley nobo di castigo minimo ta exige.

Pues aki Minister di Husticia mes ta papia cu mester permiti e Huez determina si un acusado merece un castigo menor den un caso asina, mientras cu pueblo ta exigiendo un castigo mas pisa pa cualkier persona comete un barbaridad asina.

Den pasado algun Minister di e actual Gabinete a malusa memoria di dos criatura, kendenan a wordo asesina pa nan padastro insistiendo cu ora nan drenta Gobierno lo bin cu adaptacion di leyman mas severo contra e tipo di abusonan aki.

Minister di Asunto Social, Glenbert Croes a pidi y ricibi un fondo riba e prome presupuesto di su Gobierno di 17 milyon florin pa atende cu e situacion social di nos pais, entre nan caso di abuso contra tanto muchanan menor di edad como hende muher.

Sinembargo mientras cu Minister Croes no tur ora ta di acuerdo ora cu bisa esaki, hecho ta cu e tin un plan social cu ningun hende sa pa gran parti di dje, kico su Gobierno ta haciendo, kico su Gobierno lo bay haci pa atende cu e situacion serio aki.

Ayerá mainta durante e conferencia di prensa di Gobierno caminda a atende cu e casonan di abuso sexual contra criaturanan inocente, un biaha mas Gobierno no tabatin mensahe concreto pa duna na pueblo, no a duna indicacion concreto di kico ta haciendo pa evita tur loke a pasa den ultimo dlanan, caminda e.o. pa falta di pruebanan concreto, sospechosonan di casonan di abuso sexual a sali liber.

Gobierno ni sikiera a inicia c'un campaña di conscientisacion pa comunidad, alertando, avisando, preparando comunidad pa nan ta mas alerta cu seguridad di nan yiu- y nietonan, pero un biaha mas a trece speranza pa un pueblo cu a perde speranza caba den un Gobierno cu a benta speranza afo despues di a tuma mandato di e pais.

Si Gobierno kier drecha mundo, haci un analisis interno, e.o. den Parlamento, pa determina kende(nan) a haci nan mes culpabel na abuso di menor di edad, pa demostra cu Aruba tin un Gobierno y Parlamento integro. Ban duna e mihor ehempel!!!